



# Lecziun 16 – Modul C

Ils adjectivs numerals ordinals

Rait didactica		Capacitads linguisticas						
Livels linguistics		Cuntegn dal text						
		Cuntegn dal pled						
		Furma da la frasa						
		Furma dal pled						
		Segn e sun						
		Musica						
	Diever							

- Accent da la lecziun
- Vegn era tractà



### Cuntegn

- Ils adjectivs numerals ordinals
- Scriver in text (istorgia d'amur)



### Finamira

- PDCs elavuran cun agid da lur savida idiomatica ils adjectivs numerals ordinals ed ils nums dals mais.



### Material existent

- Las quatter stagiuns, Flurin Caviezel, Herminta Toutsch, Calven Verlag, Chur 2005
- Grundkurs Rumantsch Grischun für Romanischsprachige aus der Surselva, Angela Schmed, Diplomarbeit Wintersemester 2005/06, SLA Turitg



## Lectura 1

**Las quatter stagiuns**

da Flurin Caviezel

Avant blers onns avevan ils abitants da la Val Terra ina vita simpla e paschaivla. Sch'ils carstgauns avevan said e la cultira era sitga, tramettevan ils nivels ina plievgia miaivla. Il sulegl scleriva e deva chaud e naging na stueva patir ni da fradaglia ni da chalira.

Amez il vitg steva ina gronda funtauna, nua che tuts gievan per aua frestga. Là sentupav'ins, baterlava e sa divertiva in cun l'auter. Mintga sonda devi ina festa sin la piazza sper la funtauna. Giuven e vegl sautava e chantava en il tact da la musica.

Cun mintg'onn creschiva la racolta ed uschia era la bainstanza. I deva maila gronda sco ballas. E las miscalcas-tirc eran uschè grevas ch'in um ferm pudeva portar sulettamain duas a la gia. Ins ha cumenzà a bajegiar tarmentas chasas e vias pli ladas. Sin la piazza cumin han ins construi ina chasa communal pompusa, nua che la glied discutava davart plans futurs.

Mintga chasa ha survegnì in'atgna lingia d'aua, uschia che naging na stueva pli ir per aua a la funtauna. La glied era ussa occupada tut il di cun tegnair en urden lur chasas, rugalar las vias ladas e bajegiar novas. Tuts avevan uschè blier da far che strusch insatg aveva temp la sonda da sautar e far festa.

Ils carstgauns vegnivan adina pli engurds e mintgin vuleva gudagnar uschè blers daners sco pussaivel. Il chalger ha auzà uschè fitg ses pretschs che blers stuevan ir a pe blut. E la farina dal muliner era uschè chara che la glied pli povra pudeva mangiar paun mo ina giada l'emna. La glied stueva lavurar ussa anc dapli per pudair cumprar tut quai ch'ella vuleva.

Il sulegl che aveva adina accompagnà cun plaschair la glied da la Val Terra, aveva l'ultim temp pers ses surrir. In di, cura ch'el ha vis co che dus purs sa dispitavan pervia d'in toc funs, è el vegnì uschè trist ch'el è svanì davos las muntognas e n'è betg pli turnà. Era ils nivels èn vegnids tut nairs da la gritta cura ch'els han vis ch'ils martgadants laschavan pli gugent smarschir la puma e la verdura che da vender ella pli bunmartgà.

Els han tramess plievgia, naiv e granella sin terra ed igl è vegnì uschè stgir che sulettamain ils chametgs faschevan mintgatant cler. Sin ils funs na creschiva prest nagut pli. La vivonda era vegnida stgarsa e suenter intginas emnas aveva la glied dal vitg nagut pli da mangiar.

Durant ch'ils abitants da la Val Terra sa lamentavan e pliravan èn s'entupads quatter uffants, duas mattatschas e dus mattatschs, a l'ur dal guaud. Las mattatschas avevan num Primavaira e Stad. Ellas eran las figlias dal chalger. Ils mattatschs eran ils figls dal muliner ed avevan num Atun ed Enviern. "Nus stuain far insatge", ha Primavaira ditg. "Gea, ma tge pudain nus uffants schon far?", ha Stad respundì. "Nus stuain chattar il sulegl e far vegnir enavos el", ha Atun proponì. "Lain pia ir en direenziun ost vers il Munt Sulegl. Là si insanua sto el esser", ha Enviern manegià.

Curt suenter èn ils quatter uffants arrivads ad in guaud spess. Qua ha Primavaira ditg: "Jau hai tema dad ir vinavant. Jau hai udì ch'i dettia qua spierts." "Ussa essan nus gia ids uschè lunsch e lain perquai era ir vinavant!", ha Stad respundì. Ils uffants han dà maun in a l'auter ed èn ids viaden en il guaud stgir. Mintgatant sfratgava in rom sut lur pes, ma nauschapierts n'han els ni vis ni udi.

Suenter in'urella han els bandunà il guaud e la via als ha manà en ina chavorgia profunda. Qua ha Enviern ditg: "Jau hai tema dad ir sur questa punt. Mes geniturs han raquintà ch'il diavel abiteschia en questa chavorgia." Ma Primavaira ha respundì: "Sche nus avain pudì traversar il guaud stgir, pudain nus era ir sur la punt dal diavel." Danovamain han els piglià per il maun in l'auter ed èn ids precautamain sur la stretga punt. Tuts eran cuntents cura ch'els èn arrivads da l'autra vart.

Il trutg vegniva pli e pli taiss. Suenter bleras uras eran els uschè stanchels ch'els na pudevan strusch pli ir vinavant. Cura ch'els han guardà vers il piz ch'era anc uschè lunsch davent, han el vis ina glisch debbla davos il culm. Els han prendì curaschi e clamà cun lur davosas forzas: "Sulegl, sulegl! Nus essan vegnids per ta rugar per pardun per noss geniturs!" Ma ils nivels ramplunavan anc adina e tunavan uschè dad aut che naging n'ha udì il clom d'agid dals quatter uffants.



Qua han els pers tut lur curaschi e tutta speranza. Els èn sa tschentads per terra ed han cumenzà a bragir. Sulettamain il vent ha fatg stim dals uffants. Ed el ha gi' cumpassiun cun els. Bufatg bufatg ha el prendì las larmas da lur vistas e las ha purtà al suleagl. "Guarda, quai èn las larmas dals uffants Primavaira, Stad, Atun ed Enviern. Dapi dus dis e duas notgs èn els sin via per chattar tai e per ta rugar per pardun", ha il vent ditg al suleagl. Lez ha contemplà las larmas ed ha manegià: "Vent, ti has raschun. Ils carstgauns n'èn betg uschè mals sco quai che jau hai pensà." Ed el è sa decidi da turnar a sclerir la terra.

Cura ch'il suleagl è cumparì davos il culm, èsi cun ina gia vegnì chaud e cler. Cun vusch bufatga ha el ditg: "Chalai da bragir, mes uffants. Vus avais prestà insatge extraordinari ed ils carstgauns duain vegnir remunerads per quai! Jau vegn puspè a sclerir la terra. Ma betg adina ed era betg adina tuttina ferm. Vus quatter, vus duais esser a partir dad oz las quatter stagiuns."

"Ti Primavaira vegns a stgatschar il fraid e purtar plaschair als carstgauns. Tuts duain esser alleghers, sautar e chantar."

"Ti Stad portas ils radis da mia chalira giu sin terra. Tut quai ch'è vegnì semnà duai crescer e vegnir ferm. Ils dis vegnan ad esser lungs e las notgs curtas."


"Ti Atun portas plievgia e vent. La feglia dals pumers vegn a sa colurar cotschen, brin e schizunt dad aur. Ils carstgauns duain ussa far la raccolta ed avair quità dad ella."

"E ti Enviern fas sautar las scrotas alvas e cuvras la terra cun naiv. Las notgs vegnan ad esser lungas ed ils dis curts. Ils carstgauns duain reflectar e prender temp in per l'auter."

Quel di han ins fatg ina gronda festa en la Val Terra. Primavaira, Stad, Atun ed Enviern han era dastgà prender part. Els han sautà cun tut tschels enturn la funtauna ed il suleagl glischava e splendorava sin las fatschas cuntentas dals abitants.



Exercizi 1





## Exercizi 2

**Istorgia d'amur**

1. Co ha el num?
2. Tgi è el?
3. Co ha ella num?
4. Tgi è ella?
5. Nua s'entaupan els?
6. Cura s'entaupan els?
7. Tge di el ad ella?
8. Tge respunda ella?
9. Co finescha l'istorgia?
10. Titel





## Grammatica 1

**Ils adjectivs numerals ordinals**

1. emprim, emprima
2. segund, segunda
3. terz, terza
4. quart, quarta
5. tschintgavel, tschintgavla
6. sisavel, sisavla
7. settavel, settavla
8. otgavel, otgavla
9. novavel, novavla
10. dieschavel, dieschavla
20. ventgavel, ventgavla
30. trentavel, trentavla
40. quarantavel, quarantavla
50. tschuncantavel, tschuncantavla
60. sessantavel, sessantavla
70. settantavel, settantavla
80. otgantavel, otgantavla
90. novantavel, novantavla
100. tschientavel, tschientavla